

Bosna i Hercegovina
Federacija Bosne i Hercegovine
Hercegovačko-neretvanska županija-kanton
SKUPŠTINA
Broj: **02-02-218/22**
Mostar, 02.08.2022. godine

IZVOD IZ ZAPISNIKA
sa devetnaeste (XIX) redovne sjednice Skupštine
Hercegovačko-neretvanske županije-kantona

Sjednica je održana dana 02.08.2022. u dvorani Skupštine Hercegovačko-neretvanske županije-kantona u Mostaru sa početkom rada u 12:00 sati.

Sjednicu je otvorio Šerif Špago, predsjedavajući Skupštine Hercegovačko-neretvanske županije-kantona.

Tajnik Skupštine, Željka Čule, obavila je prozivku.

Nazočni: Marija Bešker, Slavko Bilić, Marija Bošković, Stana Burić, Damir Džeba, Elvedin Grcić, Julineta Jurić, Tomislav Martinović, Ivan Odak, Andrea Pehar, Milica Pehar, Amir Šelo, Šerif Špago, Minela Krpo, Aner Žuljević, Iva Raguž, Vesna Saradžić, Đuro Prkačin, Irma Memidžan, Vera Konjevod, Alisa Hajdarović, Mejrima Hasić, Ismet Lulić, Selma Sefić, Edis Džino i Nermin Vrtić.

Izočni: Ajdin Teletović, Zora Dujmović, Dejan Kvesić i Slaven Raguž.

Konstatovano je da je na sjednici prisutno **26** zastupnika, te da postoji kvorum za rad i punovažno odlučivanje.

Nazočni po pozivu: predstavnici Vlade, predstavnici međunarodnih organizacija i predstavnici sredstava javnog informiranja.

Sjednica je javna, snimana je i snimci su sastavni dio ovog Izvoda iz zapisnika.

Predsjedavajući Skupštine obavijestio je zastupnike da je u materijalima dostavljen prijedlog dnevnog reda koji je utvrdio Kolegij Skupštine.

Otvorena je rasprava po prijedlogu izmjena i dopuna dnevnog reda.

U raspravi su učestvovali: Nevenko Herceg, Ivan Odak i Elvedin Grcić.

Predsjednik Vlade HNŽ/K Nevenko Herceg predložio je dopunu dnevnog reda slijedećim točkama:

1. a) Prijedlog Odluke o usvajanju prijedloga urbanističkog projekta turističke zone Karaotok, u sklopu područja posebnih obilježja za područje od značaja za HNŽ/K, Park prirode Hutovo blato,
b) Prijedlog Odluke o provođenju urbanističkog projekta turističke zone Karaotok, u sklopu područja posebnih obilježja za područje od značaja za HNŽ/K, Park prirode Hutovo blato,
2. Prijedlog Zakona o izmjenama Zakona o osnovnom odgoju i obrazovanju, da se razmatra po skraćenom postupku,
3. Da točka 5 umjesto Nacrt bude Prijedlog Zakona o izmjenama i dopunama Zakona o dopunskim pravima branitelja i članova njihovih obitelji u HNŽ/K-a, po skraćenom postupku.

Zastupnik Ivan Odak predložio je dopunu dnevnog reda slijedećom točkom:

1. Odluka o izmjenama Odluke o osnivanju lovišta u HNŽ/K-a.

Zastupnik Elvedin Grcić je ispred Kluba SDA je predložio da se Prijedlog Zakona izmjenama i dopunama Zakona o slatkovodnom ribarstvu HNŽ/K-a povuče sa dnevnog reda, te je zatražio stanku radi konzultacija oko dnevnog reda.

Usljedila je **stanka** od 10 minuta.

Nakon konzultacija Kolegij Skupštine je usuglasio dnevni red sa predlagačima dnevnog reda.

Predsjedavajući Skupštine HNK Šerif Špago pročitao je usuglašene prijedloge dnevnog reda o kojim je ujedno i obavljeno glasanje o uvrštavanju na dnevni red sjednice Skupštine HNŽ/K.

1. Prijedlog: da točka 5 dnevnog reda umjesto Nacrt bude „Prijedlog Zakona o izmjenama i dopunama Zakona o dopunskim pravima branitelja i članova njihovih obitelji u HNŽ/K-a“, po skraćenom postupku.

Obavljeno je glasanje.

Nakon glasanja konstatirano je da točka 5 dnevnog reda glasi „Prijedlog Zakona o izmjenama i dopunama Zakona o dopunskim pravima branitelja i članova njihovih obitelji u HNŽ/K-a“, i da se razmatra po skraćenom postupku.

2. Prijedlog: da točka 6 dnevnog reda bude po prijedlogu Vlade, „Prijedlog Zakona o izmjenama Zakona o osnovnom odgoju i obrazovanju“, također da se razmatra po skraćenom postupku.

Obavljeno je glasanje.

Većinom glasova „Za“ utvrđeno je da točka 6 bude „Prijedlog Zakona o izmjenama Zakona o osnovnom odgoju i obrazovanju“, također da se razmatra po skraćenom postupku na sjednici Skupštine.

3. Prijedlog: da točka 8 dnevnog reda ima dva dijela, pod a) Odluka o usvajanju prijedloga urbanističkog projekta turističke zone Karaotok, u sklopu područja posebnih obilježja za područje od značaja za HNŽ/K, Park prirode Hutovo blato, i pod b) Prijedlog Odluke o provođenju urbanističkog projekta turističke zone Karaotok, u sklopu područja posebnih obilježja za područje od značaja za HNŽ/K, Park prirode Hutovo blato.

Obavljeno je glasanje.

Većinom glasova „Za“ usvojeno je da se o navedenoj točki raspravlja na sjednici Skupštine HNŽ/K.

Obavljeno je glasanje da se tačke: Prijedlog izmjena i dopuna Proračuna HNŽ/K-a za 2022. godinu, i Prijedlog izmjena i dopuna Zakona o izvršenju Proračuna HNŽ/K-a za 2022. godinu razmatraju po skraćenom postupku.

Nakon glasanja jednoglasno je konstatirano da će se o navedenim točkama raspravljati po skraćenom postupku na sjednici Skupštine HNK.

Obavljeno je glasanje o dnevnom redu 19. redovne sjednice Skupštine.

Većinom glasova „Za“, uz 1 „Suzdržan“ glas usvojen je dnevni red 19. redovne sjednice Skupštine HNŽ/K.

Usvojeni Dnevni red:

1. Zastupnička pitanja;
2. Prijedlog Izmjena i dopuna Proračuna HNŽ/K za 2022. godinu (utvrđen po skraćenom postupku);
3. Prijedlog Zakona o izmjenama i dopunama Zakona o izvršenju Proračuna HNŽ/K za 2022. godinu (utvrđen po skraćenom postupku);
4. Prijedlog Zakona o izmjenama i dopunama Zakona o slatkovodnom ribarstvu Hercegovačko-neretvanske županije-kantona;
5. Prijedlog Zakona o izmjenama i dopunama Zakona o dopunskim pravima branitelja i članova njihovih obitelji u HNŽ/K (utvrđen po skraćenom postupku);
6. Prijedlog Zakona o izmjeni Zakona o osnovnom odgoju i obrazovanju (utvrđen po skraćenom postupku)
7. Prijedlog Odluke o davanju suglasnosti na Izmjene i dopune Financijskog plana Zavoda zdravstvenog osiguranja HNŽ/K za 2022. godinu;
8. a) Prijedlog Odluke o usvajanju prijedloga urbanističkog projekta turističke zone Karaotok, u sklopu područja posebnih obilježja za područje od značaja za HNŽ/K, Park prirode Hutovo blato,
b) Prijedlog Odluke o provođenju urbanističkog projekta turističke zone Karaotok, u sklopu područja posebnih obilježja za područje od značaja za HNŽ/K, Park prirode Hutovo blato.
9. Prijedlog Odluke o razrješenju zamjenika županijskog javnog pravobranitelja u Županijskom javnom pravobraniteljstvu HNŽ/K;
10. Prijedlog Zaključaka o stanju u oblasti šumarstva na području HNŽ/K.

Jednoglasno su usvojeni i zapisnici sa 18. redovne sjednice i 13. izvanredne sjednice Skupštine HNŽ/K.

AD 1. Zastupnička pitanja

SELMA SEFIĆ:

Pozdravljam sve prisutne. Ja danas imam jedno pitanje, koje je više jeli karakteristično za lokalne vlasti, ali s obzirom da se radi o najvećem rasadniku u Hercegovini tako da ja koristim svoje jeli zastupničko pravo da uputim ovo pitanje Gradu Mostaru. Dakle, dali planira oživjeti proizvodnju u svojim rasadnicima bivših „Parkova i nasada“, kojim sada upravljaju dva preduzeća „Komos“ i „Parkovi“, te dali se planira oživjeti proizvodnja dekorativnog bilja u najvećem rasadniku u Hercegovini, a to je rasadnik „Bor“? S obzirom da se radi dakle opet ponavljam o najvećem rasadniku u Hercegovini te je on od velike važnosti, veoma je zabrinjavajuće vidjeti jeli trenutno stanje istog. Dakle, kako sam struka utvrđuje nemarom uprave doveden je u fazu zapuštenosti te nije se u njega ulagalo, kako u nužni repromaterijal, i jednostavno su ga pustili da se sam uruši. Što se tiče rasadnika, on ima svu potrebnu ovaj infrastrukturu, dakle vodne pumpe i vodonatapne sisteme, itd., odnosno od neprocjenjive je jeli vrijednosti za Grad Mostar, koji ima konstantnu potrebu za hortikulturnim sadnim materijalom svih vrsta, kao što su grmovi, stabla i jeli sezonsko cvijeće i trajnice. Međutim, sve to navedeno se sada uvozi i nabavlja se iz privatnih firma, a dodatno povećava troškove, a ujedno je i zapostavljena domaća ovaj proizvodnja. Prema podacima o stečajnoj masi, Komos, navedeni rasadnik „Bor“, vodi se jeli jednim dijelom u njihovoj stečajnoj masi, koju bi isti po nekim informacijama rado prodali u cilju namirenja vlastitih ovaj dugova koji su nastali uslijed katastrofalnog poslovanja same uprave „Komosa“. Toliko. Zahvaljujem.

IVAN ODAK:

Moje zastupničko pitanje na zamolbu, zastupničko pitanje na Ministarstvo prosvjete, kulture i športa u Vladi HNŽ-a, zbog čega pomoćnici u nastavi u HNŽ-u imaju samo 399 KM plaću sa visokom stručnom spremom bez toplog obroka i prijevoza, dok im je u drugim županijama za isti posao plaća umanjena samo 20% od plaće profesora u školi sa plaćenim toplim obrokom i prijevozom? Obrazloženje pitanja. Status pomoćnika u nastavi u HNŽ-u je marginaliziran i diskriminirajući u odnosu na druge pomoćnike u ostalim županijama zbog toga što su im primanja ispod zagarantirane plaće u F BiH. Zbog niskih primanja koja su ispod svakog minimuma nakon kratkog vremena pomoćnici u nastavi odlučuju napustiti to radno mjesto, uvjeti rada su otežani, vrlo malo je edukacijskih tečajeva, a da ne govorimo o radu stručnih timova kao što su logopedi, psiholozi, defektolozi, koji bi trebali biti stručna pomoć asistentima, a ponajviše djeci i njihovim roditeljima. Važno je naglasiti kako se djeca sa poteškoćama u razvoju emocionalno veću za pomoćnike u nastavi koje su dobili na početku školovanja, sama promjena asistenta dovodi do njihovog neprihvatanja i remeti im poznatu rutinu, na što oni jako negativno reaguju. Otprije je poznato da Vlada HNŽ-a izdvaja puno veća sredstva za mnoge druge projekte te pomoći privatnicima i ostalima, međutim kada je ova tematika u pitanju i pomoć djeci sa poteškoćama nemaju nimalo razumijevanja. Dovoljno je da Vlada HNŽ-a uradi što je uradila i Vlada ZHŽ-a kako bi status pomoćnika u nastavi postao vrjedniji i adekvatan uloženi naporu tih ljudi, kako bi osobe koje se odluče za takav rad imale razloga i da se sa tim poslovima zadrže. Ovakvim financiranjem nije ni čudo što je taško pronaći pomoćnike u nastavi jer na tim poslovima mogu raditi samo osobe sa visokom stručnom spremom, odgovarajuće struke, te se na ovaj način školovane ljude dodatno ponižava i diskreditira. Njihov status je omalovažavajući i ovim ponašanjem oni se dovode u nepovoljan položaj iako rade puno radno vrijeme. Znajući koliko je standard života naglo porastao primanja koja iznose 400 KM izgledaju kao milodar, to je jest milostinja, te sa pravom pitaju tko bi to od članova Vlade sa visokom stručnom spremom radio za taj iznos. Očekuju da će Vlada pogledati i postati svjesna da takvim financiranjem pomoćnika u nastavi ismijava i dodatno ponižava mlade

visoko obrazovane ljude, željne rada i pomoći djeci kojima je to najpotrebnije. Zato predlažemo da Vlada HNŽ-a svojom odlukom, a uz suglasnost Skupštine HNŽ-a poveća i izjednači primanja ovim ljudima sa iznosom zagarantirane plaće u F BiH. Hvala.

JULINETA JURIC:

Poštovane kolegice i kolege, sve vas zajedno pozdravljam. Za današnju sjednicu Skupštine imam jednu inicijativu, za Zavod za javno zdravstvo HNŽ-a. Inicijativa je pokretanje tri nacionalna programa za rano otkrivanje zloćudnih bolesti, raka dojke-nastavak provođenja, debelog crijeva i vrata maternice. Bosna i Hercegovina je jedna od rijetkih zemalja u Europi koja nema nacionalni program za rano otkrivanje raka dojke, gotovo sve države su taj program već davno donijele, a neke u okruženju i prije više od 10 godina, Republika Hrvatska navedeni je program donijela 2006. godine. Program za rano otkrivanje raka dojke za žene u HNŽ-u prvi je program koji se provodi u BiH i temelji se na europskim smjernicama za osiguranje kakvoće probira, skrininga i dijagnostike raka dojke. Program je podržan softverski na način da su putem informacijskog sustava platforme sve slike u digitalnom obliku dostupne i liječnicima specijalistima bez obzira gdje se isti nalaze. Sam probir, skrining je anoniman i osigurava se najviši mogući stupanj zaštite osobnih podataka. Iskustva drugih zemalja u kojima se provode programi ranog otkrivanja raka dojke pokazala su da dobro osmišljen, sveobuhvatan i multidiscipliniran pristup jamči značajno poboljšanje zdravlja i rano detektiranje raka, što doprinosi značajno većoj stopi izlječenja ove bolesti. Program treba obuhvatiti sve žene od 45 do 69 godina, bez obzira na status zdravstvenog osiguranja.

Preventivni programi ranog otkrivanja raka debelog crijeva i raka vrata maternice u HNŽ-u, preventivnim programom ranog otkrivanja raka debelog crijeva obuhvaćene bi bile sve žene i muškarci u HNŽ-u u dobi od 50 do 74 godine. U okviru programa žene i muškarci bi se pozivali na provedbu testiranja na nevidljivo krvarenje u stolici svake dvije do tri godine, a pozitivne osobe bi se zatim pozivale na kolonskopski pregled radi utvrđivanja uzroka krvarenja. Testiranje na nevidljivu krv u stolici je jednostavna pretraga te svatko može sam na nanijeti uzorak stolice na test-karton . Cilj programa je otkriti rak u početnom stadiju te smanjiti smrtnost od raka debelog crijeva za 15% u razdoblju od 10 do 13 godina od početka provedbe programa. Preventivnim programom ranog otkrivanja raka vrata maternice bile bi obuhvaćene sve žene u HNŽ-u od dobi od 25 do 64 godine. U okviru programa žene bi se pozivale na papa test svake tri godine. Papa test je jednostavna neinvazivna pretraga kojom se uzima obrisak rodnice, vrata maternice i kanala vrata maternice. Tada su mogu pronaći promjenjive stanice u ranom stadiju koje se mogu lako odstraniti, tako da se ne razviju u rak. Cilj programa je smanjiti pojavnost raka vrata maternice za 60%, 8 godina od početka programa. Hvala.

ALISA HAJDAROVIĆ:

Zahvaljujem predsjedavajući. Pozdravljam kolegice i kolege. Imam inicijativu Ministarstvu unutrašnjih poslova, da se saobraćaj u Ulici Jakova Baruha Španca izmijeni u dvosmjerni režim. Obrazloženje. Nedavnom izmjenom režim saobraćaja u Ulici Jakova Baruha Španca izmijenjen je iz dosadašnjeg pravca istok-zapad u pravac zapad-istok, time smo dobili dva ulaza u Ulicu Alekse Šantića, a samo jedan izlaz kod apoteke „Europharm“. Kada počne nastava i kad krenu drugačiji vremenski uslovi, praćeni kišom, doći će do potpunog kolapsa i zagušenja saobraćaja, bit će vrlo otežan izlazak iz Šantićeve ulice i uključenje u Ulicu Mostarskog bataljona. Iz tog razloga smatram da bi zbog rasterećenja saobraćaja bilo neophodno da se saobraćaj u Ulici Jakova Baruha Španca izmjeni u dvosmjerni režim. Zahvaljujem.

VESNA SARADŽIĆ:

Zahvaljujem predsjedavajući. Pozdravljam sve prisutne i želim nam uspješan rad današnje sjednice. Također koristim ovu priliku da uputim čestitke predsjedavajućem i zamjeniku predsjedavajućeg Skupštine što konačno radimo u adekvatnim uslovima. Ja imam jednu inicijativu i jedno pitanje. U BiH na godišnjem nivou oko 140 žena umre od raka grlića materice, a oboli oko 550, riječ je o drugom najrasprostranjenijem karcinomu kod žena te prvom kod žena u dobi od 15 do 44 godine. U slučaju pravovremenog otkrivanja promjena na grliću materice izlječenje je 100%-tno, o tome mogu posvjedočiti i ličnim primjerom, a 2007. godine učestvovala sam na konferenciji u Evropskom parlamentu u Briselu koja je održana povodom obilježavanja „sedmice prevencije od karcinoma cervkisa i značaju i potrebi vakcine“. Vakcina protiv humanog papilomavirusa koji uzrokuje gotove sve nove slučajeve raka grlića materice je siguran, efikasan i ključan korak u borbi protiv ove bolesti. Cilj Svjetske zdravstvene organizacije je da do 2030. godine bar 75% djevojčica dobije vakcinu da bi spriječili ovaj karcinom i da se 90% žena može na vrijeme pregledati i na vrijeme utvrditi početne promjene. Uzimajući u obzir sve prethodno navedeno, ispred Kluba SDP-a podnosim inicijativu prema resornom ministarstvu da pokrene sve aktivnosti kako bi vakcina bila dostupna korisnicama našeg kantona.

Što se tiče pitanja, pitanje upućujem Zavodu za javno zdravstvo HNK-a s obzirom da je u okviru njegove nadležnosti kontrola ispravnosti voda. Sezona je kupanja, zagađenje rekreativnih voda je evidentno, bilo da se radi o hemijskoj kontaminaciji ili kanalizaciji. Dali Zavod prati parametre zagađenja kao obaveznog dijela monitoringa u sezoni kupanja, kada je zadnji put izvršena kontrola ispravnosti vode i ako jeste koji su rezultati i od kojih zagađivača potiču? Zahvaljujem.

MINELA KRPO:

Pozdravljam sve prisutne. Ja imam jedno danas pitanje za Zavod zdravstvenog osiguranja. Koliko je Zavod zdravstvenog osiguranja HNK-a bio efikasan u pogledu provedbi 14 preporuka Kancelarije za reviziju institucija u F BiH-a nakon izvršene finansijske revizije Zavoda zdravstvenog osiguranja HNK-a za 2020. godinu? Hvala.

ANER ŽULJEVIĆ:

Zahvaljujem predsjedniče. I ja bih da se pridružim svim ovim čestitkama za ovaj ambijent u kojem danas radimo i u kojem će radit naravno svi oni koji dođu poslije nas, na neki način ovo zaslužuje institut skupštine kantona, ono što smo imali ranije kao velika sala, a djelovalo je kao učionica je jednostavno na neki način bila i vrlo loša poruka svima onima koji dolaze da posjete ovu instituciju. Ja imam jedno praktično pitanje, postavljam ga svima nama, svim ministrima, svim zastupnicima, vjerovatno se i vi srećete sa tim problemom, a to je da svi oni koji u ovom momentu dobiju uputnicu za magnet prvi termin koji mogu dobiti je, danas sam provjerio, 02.04.2023. godine!? Ja stvarno ne znam šta se u ljudskom organizmu može dogoditi za 7 ili 8 mjeseci od momenta kad doktor sumnja u to da eventualno se radi o nekoj bolesti koja može biti na sreću lakša, ali nažalost može biti i teža, šta znači 8 mjeseci u propuštenoj terapiji, do utvrđivanja generalno stanja organizma po procjeni doktora da neko treba da ide na magnet. Ja kao zastupnik ove Skupštine i narod u očaju smo u stalnom kontaktu pokušaja da se tu nešto kao sređuje, to jednostavno nije metodologija nit mog rada nit se to može više ikako uspostaviti van sistemski zato što ja ne želim, a vjerujem i da niko u ovoj sali ne želi da navečer legne i da kaže da je nekoga stavio naprijed, a da je nekoga pomakao, jer vi kad stavljate nekoga ispred onda ste sigurno nekoga pomakli, pa ste uticali na taj redoslijed procjene u smislu tog slikanja. Ja ne znam dali mi imamo ikakve kapacitete, novac imamo, dali imamo nekakav format

mogućnosti kroz resorno ministarstvo, da pokušamo da nadomjestimo očigledno jedan problem koji je nastao zbog crkavanja te opreme, kroz privatne kapacitete, u smislu onoga što imamo u našem kantonu, a imamo ih i oni su na raspolaganju i imaju svoje stručne posade i mogu i spremni su da izađu u susret da rade i u više smjena jer javno zdravstvo više ne može primiti jer ljudi rade u toliko smjena koliko aparat može da izdrži. Znači ovdje se ne može više ništa prebaciti u okviru javnog zdravstva jer ono radi maksimalno koliko mašina može raditi, ljudi je opslužuju i to je praktično nešto što ne smanjuje listu, ali ako bi dodali u određenom, ograničenom vremenskom periodu kapacitete koje imamo u privatnom sektoru, po nekim racionalnim i razumnim cijenama, koje ne moraju bit ove tržišne koje su objavljene ovamo, onaj volio bih da neko preuzme na sebe obavezu, ja sam spreman da hodam svaki dan s bilo kim na te sastanke, da zamolimo i da magnetne stavimo u funkciju i pokušamo da smanjimo da ovo bude u nekih racionalnih 60 dana, 45, a ako možemo spustit na mjesec to bi bilo idealno mislim u toj priči. Tako da nisam postavio nikome konkretno pitanje, resorno ministarstvo samo po sebi je to koje bi praktično trebalo pokrenut ovu priču, ali mislim da imamo ozbiljan problem, svi ga vi vjerovatno osjetite, svako ima nekoga u familiji kojem to zatreba, ja kažem dabogda nikome ne trebao, ali nažalost očigledno previše treba nego što mi smatramo. I ja mislim da smo mi pozvani ovdje svi zajedno da pokušamo riješit ovaj problem u što skorije vrijeme. Toliko. Zahvaljujem.

STANA BURIĆ:

Drage kolege sve vas iskreno pozdravljam. Zgrada jest lijepa, samo evo nadam se da će svaki sljedeći saziv bit kvalitetniji od nas, ja se ne mogu pohvalit da smo nešto dobro napravili, zapravo da smo bili izvrsni, nismo, ali dobro.

Ja sad imamo jedan prijedlog Vladi, za dopunu pozitivne liste lijekova, HNK-a. Predlažem Vladi HNK-a da što prije vankomicin kapsule uvrsti na pozitivnu listu lijekova HNK-a. Obrazloženje. Sve su veće potrebe pacijenata za lijekom vankomicin, bilo kao nastavak bolničkog liječenja ili ambulantno. Lijek se nalazi samo na bolničkoj listi, jedna potrebna doza ovog lijeka za pacijenta iznosi oko 400 KM, pa većina naših ljudi to sebi ne može priskrbit. Stavljanjem ovog lijeka na pozitivnu listu lijekova rasteretio bi se broj bolničkih dana liječenja, a pacijenti bi mogli nastaviti kućno liječenje onoliko koliko im liječnik ordinira. Lijek se uglavnom propisuje od strane infektologa ili gastroenterologa za liječenje klostridijskog proljeva, lijek je puno efikasniji od metronidazola koji je na listi, ali je postao rezistentan. Hvala. Pozdrav.

AMIR ŠELO:

Pozdravljam uvaženo rukovodstvo Skupštine. Koristim ovu priliku da predsjedavajućem Skupštine, zamjeniku predsjedavajućeg Skupštine i uvaženom sekretaru Skupštine gospođi Željki Čuli čestitam na proširenju prostorija i proširenju kapaciteta Skupštine HNK-a. Kao što smo svi čuli zaista ovo zakonodavno tijelo zaslužuje da ima jednu salu u kojoj ćemo mi svi kao zastupnici moći kvalitetno radit, u kojoj će novi saziv Skupštine moć puno kvalitetnije raditi od nas koji smo dosad bili u prethodnim mandatima i da pokušamo kroz nove prostorije i proširene kapacitete da građanima, mladim ljudima i svima onima koji su zainteresovani za naš rad da puno bolje i transparentnije približimo rad Skupštine HNK-a.

Ja upućujem jedno poslaničko inicijativu prema Ministarstvu unutrašnjih poslova i Vladi HNK-a, obzirom da imaju predviđena sredstva i kroz rebalans budžeta, da se ne području mjesne zajednice Gnojnice na potezu kraj magistralne ceste M-6.1 postavi jedan stacionirani radar jer smo svjedoci da je u prethodnom periodu na području Gnojnica i Dračevica bio veliki broj udesa koji su imali kobne posljedice. Toliko od mene.

AD 2. Prijedlog Izmjena i dopuna Proračuna HNŽ/K za 2022. godinu (utvrđen po skraćenom postupku)

Obrazloženje su dali Nevenko Herceg predsjednik Vlade HNŽ/K, i ministar financija Adnan Faladžić.

Otvorena je rasprava.

U raspravi su sudjelovali: Đuro Prkačin, Amir Šelo, Slavko Bilić, Aner Žuljević, Ivan Odak, Tomislav Martinović, Šerif Špago, Nevenko Herceg i ministar Adnan Faladžić.

Zamjenik predsjedavajućeg Tomislav Martinović predložio je slijedeći amandman:

Amandman 1:

Zadužuje se Vlada HNŽ/K i Ministarstvo obrazovanja, znanosti, kulture i športa da izvrši povećanje studentskih stipendija od 01.10.2022. sa 120 KM na 150 KM.

Predsjedavajući Skupštine HNK Šerif Špago predložio je slijedeći amandman:

Amandman 1:

Rukovodstvo Skupštine predlaže da Vlada razmotri mogućnost i da se završi komplet projekat zgrade Skupštine HNŽ/K, da se pokušaju osigurati sredstva da do kraja godine se dobije i nezavršeni dio, a to je projekat informatizacije vezano za elektronsko glasanje, za javno snimanje i da se dostignu standardi koji od nas traže iz međunarodne zajednice, OESC-a i svih drugih koji prate rad zakonodavnih i izvršnih vlasti.

Zaključena je rasprava po ovoj tOčki dnevnog reda.

AD 3. Prijedlog Zakona o izmjenama i dopunama Zakona o izvršenju Proračuna HNŽ/K za 2022. godinu (utvrđen po skraćenom postupku)

Obrazloženje je dao ministar Adnan Faladžić.

Obavljeno je glasanje o Prijedlogu Zakona o izmjenama i dopunama Zakona na izvršenje Proračuna HNŽ/K za 2022. godinu.

Većinom glasova „Za“, uz 3 glasa „Protiv“, usvojen je Prijedlog Zakona o izmjenama i dopunama Zakona na izvršenje Proračuna HNŽ/K za 2022. godinu.

Usljedila je **stanka**.

Nakon stanke obrazloženje je oko uloženi amandmana dao Nevenko Herceg predsjednik Vlade HNŽ/K, navodeći da će Vlada iz tekuće rezerve i drugih poticaja osigurati sredstva za opremanje objekta Skupštine i povećanje stipendija.

Obavljeno je glasanje po Prijedlogu Izmjena i dopuna Proračuna HNŽ/K za 2022. godinu.

Nakon glasanja konstatirano je da je većinom glasova „Za“, uz 3 glasa „Protiv“ usvojena Izmjena i dopuna Proračuna HNŽ/K za 2022. godinu.

Predsjedavajući Skupštine HNŽ/K predložio je slijedeći Zaključak:

Zadužuje se Vlada HNK i Ministarstvo obrazovanja, znanosti, kulture i športa da izvrši povećanje studentskih stipendija od 01.10.2022. sa 120 KM na 150 KM.

Obavljeno je glasanje o navedenom Zaključku.

Nakon glasanja konstatirano je da je Zaključak jednoglasno usvojen.

AD 4. Prijedlog Zakona o izmjenama i dopunama Zakona o slatkovodnom ribarstvu Hercegovačko-neretvanske županije-kantona

Objasnjeno je da Donko Jović, ministar poljoprivrede, šumarstva i vodoprivrede u Vladi HNŽ/K.

Otvorena je rasprava.

U raspravi su sudjelovali: Irma Memidžan, Šerif Špago, Amir Šelo, Tomislav Martinović i ministar Donko.

Zastupnici Irma Memidžan, Šerif Špago i Amir Šelo uložili su u pisanom obliku amandmane na ovaj Zakon koje Vlada HNŽ/K do naredne sjednice Skupštine treba razmotriti i dostaviti Skupštini izjašnjenje na amandmane.

Zaključena je rasprava po ovoj tački dnevnog reda.

AD 5. Prijedlog Zakona o izmjenama i dopunama Zakona o dopunskim pravima branitelja i članova njihovih obitelji u HNŽ/K (utvrđen po skraćenom postupku)

Objasnjeno su dali Oliver Soldo, ministar branitelja u Vladi HNŽ/K i Slavko Bilić predsjedavajući komisije za pitanje branitelja Skupštine HNŽ/K-a.

Otvorena je rasprava.

U raspravi su sudjelovali: Šerif Špago i ministar Soldo.

Predsjedavajući Skupštine HNK Šerif Špago predložio je 2 amandmana.

Amandman 1: U članku 5 Zakona o izmjenama i dopunama Zakona o dopunskim pravima branitelja i članova njihovih porodica u HNŽ/K-a, u članu 5 iza, u zadnjoj rečenici, iza riječi „invalidnine“ brišu se riječi „a koje nije starije od 40 godina“, te riječi se brišu, a dodaju riječi „bez obzira na godine života ukoliko to pravo ne može ostvariti po drugom osnovu“.

Amandman 2: U članku 6, na kraju stava 1 brišu se riječi „a koje nije starije od 40 godina“, a dodaju riječi „bez obzira na godine života“.

AD 6. Prijedlog Zakona o izmjenama Zakona o osnovnom odgoju i obrazovanju (skraćeni postupak)

Objasnjeno je da Rašid Hadžović ministar obrazovanja, znanosti, kulture i športa u Vladi HNŽ/K.

Otvorena je rasprava.

U raspravi su sudjelovali: Aner Žuljević, Amir Šelo, Elvedin Grcić i Šerif Špago.

Zaključena je rasprava.

Zastupnik Aner Žuljević uložio je sljedeći amandman:

Amandman 1: U članu 97 se mijenja stav i glasi: za direktora osnovne škole može biti izabran kandidat koji pored općih uvjeta popisanih zakonom mora da ispunjava i sljedeće uslove: da nije alkoholičar, da nije osuđivan za krivično djelo, da nije lice protiv kojeg je potvrđena optužnica i izrečena pravosnažna presuda ili mjera za jedno ili više kaznenih djela za koje se odredbama važećeg kaznenog zakona može izreći kazna zatvora u trajanju od 3 mjeseca i više.

AD 7. Prijedlog Odluke o davanju suglasnosti na Izmjene i dopune Financijskog plana Zavoda zdravstvenog osiguranja HNŽ/K za 2022. godinu

Obrazloženje je dao Andrej Čović, ispred Zavoda zdravstvenog osiguranja HNŽ/K.

Otvorena je rasprava.

U raspravi su sudjelovali: Minela Krpo, Marija Buhač ispred ZZO-a, Aner Žuljević i Šerif Špago.

Obavljeno je glasanje o Prijedlogu Odluke o davanju suglasnosti na Izmjene i dopune Financijskog plana Zavoda zdravstvenog osiguranja HNŽ/K za 2022. godinu.

Nakon glasanja konstatirano je da je Prijedlog Odluke o davanju suglasnosti na Izmjene i dopune Financijskog plana Zavoda zdravstvenog osiguranja HNŽ/K za 2022. godinu većinom glasova usvojen.

AD 8. a) Prijedlog Odluke o usvajanju prijedloga urbanističkog projekta turističke zone Karaotok, u sklopu područja posebnih obilježja za područje od značaja za HNŽ/K, Park prirode Hutovo blato;

b) Prijedlog Odluke o provođenju urbanističkog projekta turističke zone Karaotok, u sklopu područja posebnih obilježja za područje od značaja za HNŽ/K, Park prirode Hutovo blato

Obrazloženje su dali prof.dr.sc Jaroslav Vego i gđa. Zurovac.

Otvorena je rasprava.

U raspravi nije nitko sudjelovao.

Obavljeno je glasanje a) Prijedlog Odluke o usvajanju prijedloga urbanističkog projekta turističke zone Karaotok, u sklopu područja posebnih obilježja za područje od značaja za HNŽ/K, Park prirode Hutovo blato.

Nakon glasanja konstatirano je da je a) Prijedlog Odluke o usvajanju prijedloga urbanističkog projekta turističke zone Karaotok, u sklopu područja posebnih obilježja za područje od značaja za HNŽ/K, Park prirode Hutovo blato jednoglasno usvojen.

Obavljeno je glasanje b) Prijedlog Odluke o provođenju urbanističkog projekta turističke zone Karaotok, u sklopu područja posebnih obilježja za područje od značaja za HNŽ/K, Park prirode Hutovo blato.

Nakon glasanja konstatirano je da je b) Prijedlog Odluke o provođenju urbanističkog projekta turističke zone Karaotok, u sklopu područja posebnih obilježja za područje od značaja za HNK, Park prirode Hutovo blato jednoglasno usvojen.

AD 9. Prijedlog Odluke o razrješenju zamjenika županijskog javnog pravobranitelja u Županijskom javnom pravobraniteljstvu HNŽ/K

Obrazloženje je dao Šerif Špago predsjedavajući Skupštine HNŽ/K.

Otvorena je rasprava.

U raspravi nije nitko sudjelovao.

Obavljeno je glasanje.

Nakon glasanja konstatirano je da je Prijedlog Odluke o razrješenju zamjenika kantonalnog javnog pravobranioca u Županijskom javnom pravobraniteljstvu HNŽ/K jednoglasno usvojen.

Nastavak AD 5. Prijedlog Zakona o izmjenama i dopunama Zakona o dopunskim pravima branitelja i članova njihovih obitelji u HNŽ/K (utvrđen po skraćenom postupku)

Obrazloženje je dao ministar Oliver Soldo i naveo da je Vlada HNŽ/K odbila predloženi amandman i ostala pri izmjenama i dopunama Zakona koji su predloženi.

Šerif Špago odustao je od predloženih amandmana vezano uz ovaj Zakon.

Obavljeno je glasanje o Prijedlogu Zakona o izmjenama i dopunama Zakona o dopunskim pravima branitelja i članova njihovih obitelji u HNŽ/K (utvrđen po skraćenom postupku).

Većinom glasova „Za“, i 2 glasa „Protiv“ usvojen Prijedlog Zakona o izmjenama i dopunama Zakona o dopunskim pravima branitelja i članova njihovih obitelji u HNK (utvrđen po skraćenom postupku).

Nastavak AD 6. Prijedlog Zakona izmjenama Zakona o osnovnom odgoju i obrazovanju (skraćeni postupak)

Obrazloženje je dao Rašid Hadžović ministar obrazovanja, znanosti, kulture i športa u Vladi HNŽ/K.

Vlada HNŽ/K je uložila **Amandman 1:** U Zakonu o osnovnom odgoju i obrazovanju, Narodne novine HNŽ, čitam verziju na hrvatskom jeziku, broj 8/04, 4/04, 5/04, 1/14 i 7/16, u članku 97, stavak 4, mijenja se i glasi: direktor škole imenuje se na razdoblje od 4 godine. Po isteku mandata direktora, škola je dužna osobi osigurati radno mjesto u skladu sa stručnom spremom i radnom sposobnosti. Članak 2, ovaj zakon stupa na snagu 8.-og dana od dana objave u Narodnim novinama HNŽ-a. i on je postao sastavni dio Zakona.

Obavljeno je glasanje o amandmanu zastupnika Anera Žuljević:

Amandman 1: U članu 97 se mijenja stav i glasi: za direktora osnovne škole može biti izabran kandidat koji pored općih uvjeta popisanih zakonom mora da ispunjava i sljedeće uvjete: da nije alkoholičar, da nije osuđivan za krivično djelo, da nije lice protiv kojeg je potvrđena optužnica i izrečena pravosnažna presuda ili mjera za jedno ili više krivičnih djela za koje se odredbama važećeg krivičnog zakona može izreći kazna zatvora u trajanju od 3 mjeseca i više.

Većinom glasova „Protiv“ i 6 glasova „Za“ amandman nije dobio potrebnu većinu.

Obavljeno je glasanje o Prijedlogu Zakona izmjenama Zakona o osnovnom odgoju i obrazovanju (skraćeni postupak) sa uložnim amandmanom Vlade HNŽ/K koji je postao sastavni dio Zakona.

Većinom glasova „Za“, uz 1 glas „Protiv“, i 1 „Suzdržan“ glas usvojen je Prijedlog Zakona izmjenama Zakona o osnovnom odgoju i obrazovanju (skraćeni postupak) sa spomenutim amandmanom kojeg je Vlada HNŽ/K predložila.

AD 10. Prijedlog Zaključaka o stanju u oblasti šumarstva na području HNŽ/K

Obrazloženje je dao predsjedavajući Skupštine HNK Šerif Špago, koji je istakao da je Kolegij Skupštine HNK usuglasio sljedeće Zaključke:

1) Skupština HNŽ/K smatra neophodnim poduzimanje svih mjera u cilju zaštite šuma i šumskih resursa na području HNŽ/K;

2) Skupština HNŽ/K smatra neophodnim usaglašavanje stavova županijske/kantonalne razine vlasti sa jedinicama lokalne samouprave radi donošenja Zakona o šumama HNŽ/K;

3) zadužuju se sve nadležne županijske/kantonalne institucije da poduzmu sve neophodne mjere u cilju zaštite šuma, šumskog zemljišta i drugih šumskih resursa od daljnjeg nezakonitog korištenja i uništavanja;

4) zadužuje se Vlada HNŽ/K i Ministarstvo poljoprivrede, šumarstva i vodoprivrede da u roku od 45 dana u skupštinsku proceduru upute usuglašen Prijedlog Zakona o šumama HNŽ/K;

5) Zaključci stupaju na snagu danom donošenja i objavit će se u Narodnim novinama HNŽ/K.

Otvorena je rasprava.

U raspravi su učestvovali: Alisa Hajdarović, Ivan Odak i Šerif Špago.

Zastupnica Alisa Hajdarović uložila je prijedloge izmjena Zaključaka:

Prijedlog 1: Zaključak pod 3) se u potpunosti briše.

Prijedlog 2: U zaključku pod 4) se briše rok od 45 dana da se zakon uputi u skupštinsku proceduru.

Obavljeno je glasanje o navedenim prijedlozima izmjena Zaključaka zastupnice Hajdarović.

Nakon glasanja konstatirano je da navedeni prijedlozi izmjena Zaključaka zastupnice Hajdarović nisu dobili potrebnu većinu.

Obavljeno je glasanje o Prijedlogu Zaključaka o stanju u oblasti šumarstva na području HNK.

Nakon glasanja konstatirano je da su većinom glasova „Za“, uz 6 „Suzdržanih“ glasova Zaključci dobili potrebnu većinu.

Sjednica je završena u 17:30 sati.

Zapisničar
Dario Topić

Predsjedavajući
Šerif Špago